

2 Petro

JANDIKO: Jaote Petro

KAR NDIKO: Ok ong'ere to onyalo bedo Rumi

KINDE NDIKO: 66 E YIE RUOTH (AD)

GIK MANIE IYE:

Baruani nondiki kod Petro ka thone ne chiegni kendo owuoyo kuom chandruok mane Petro oneno ni biro bedo bang' ka osetho. Otemo jiwo jo- Kristo mondo omed dongo e ngmagi mar yie, kagimedo ng'eyo adieri manie Injili mar jo- Kristo. Ok ondike sigana to mana weche mag adiera. Osiemogi kuom jopuonj mag miriambo mabiro tamore winjo adieri ka gijiwo puonjgi giwegi magala gala mopogore gi puonj kanisa. To mogik to owachoni Kristo biro duogo odiechieng' moro mondo oketh kendo otiek chenro manie pinyni omiyo kuom mano kik waket yiewa kuom pinyni.

THORRO:

Petro mar ariyo wuoyo kuom bedo motegno e kind sand mang'eny ma kedo kodwa mondo mi wawe adieri. Piny temo mondo otiek gik ma Nyasaye timo, to nyaka wakwed gik ma kamago ka wadak e ngima mowinjore e nyim Nyasaye, kawageno kuom adiera, dhil e sand, yie kuom Nyasaye, kod bedo gi geno kuom biro Kristo.

WECHE MOCHAN KAE GIN

1. Chenro maber makelo dongruok ne ngima ja- Kristo (1:1-21)
2. Siem kuom jopuonj mag miriambo (2:1-22)
3. Jip mawuoyo kuom biro Kristo mar ariyo (3:1-18)

1 An Simon Petro, jatich kendo jaote mar Yesu Kristo,

Andikonu un joma osejudo yie ma nengone tek kaka marwa, kuom tim makare mar Nyasachwa kod Jawarwa Yesu Kristo.

²Ng'wono kod kuwe mogundho obed kodu kumedo ng'eyo Nyasaye kod Yesu Ruodhwa.

Miyo Luong Mar Ng'ato Kod Yierone Bedo Adiera.

³Tekone maduong' osemiyowa gik moko duto ma wadwaro mar ngima, kendo luoro Nyasaye, kuom ng'eyowa mar Jal mane oluongowa kuom duong'ne owuon kod berne. ⁴Kuom magi osemiyowa singruokge madongo kendo ma nen-

gogi tek, mondo e kuom gigi unyalo kawo kit Nyasaye kendo mondo utony ua e kethruok ma gombo maricho mag pinyni lelo.

⁵Kuom mano, temuru matek kaka unyalo mondo umed yieu gi ber, ber to meduru gi ng'eyo; ⁶ng'eyo to meduru gi ritruok, to ritruok meduru gi kinda, kinda meduru gi luoro Nyasaye, ⁷luoro Nyasaye meduru gi ng'wono mar owete; to ng'wono mar owete to meduru gi hera.

⁸Nikech ka un-gi kit timbego mogundho, to gibiro geng'ou mondo kik ubed joma nono maak nyag olemo e ng'eyo ma ungo kuom Ruodhwa Yesu Kristo. ⁹To ka ng'ato onge gi kidogi e ngimane to en ng'ama neno machiegni kendo ma muofu nimar wiye osewil ni ne osepuodhe

oweyo richoge machon.

¹⁰Emomiyo, jowetena, meduru bedo gi siso mar loso luongu kod yiero maru kare. Nikech ka utimo gigi to ok unupodhi, ¹¹kendo unuyud rwak maratipo ei Pinyruoth mochwere mar Ruodhwa kendo Jawarwa Yesu Kristo.

Koro Mar Ndiko

¹²Omiyo pod abiro mana medo paronu wehegi, kata obedo ni ung'eyo kendo ugoruru motegno e adiera ma koro ungo. ¹³Aparo ni en gima ber mondo achiew pachu ka pod anie kiru mar ringruokni, ¹⁴nikech ang'eyo ni achiegni weyo kiruni mana kaka Ruodhwa Yesu Kristo osenyisa maler. ¹⁵Kendo abiro temo matek mondo ane ni ka aseweyou to ubiro siko kuparo gigi.

¹⁶Ne ok waluwu sigendini ma dhano oloso gi riekone kane wanyisou kuom teko kod biro mar Ruodhwa Yesu Kristo, to wawegi ne wan joneno mar duong'ne. ¹⁷Nikech ne oyudo luor kod duong' kuom Nyasaye Wuoro kane duol obirone moa e Duong' Mamalo Molooyo, ni, "Ma e Wuoda mahero ma chunya morgo!" ¹⁸Wan wawegi ne wawinjo duolni mane oa e poloni, kane wan kode ewi got maler.

¹⁹Omiyo wan-gi weche jonabi ma oselernwa tiendgi. Ka uchiko itu ne wehegi to ubiro konyoru, nikech gichalo gi ler marieny ka aa e mudho, nyaka chop odiechieng'no yawre mi ler mar sulwe mokinyi meny chunjeu. ²⁰To molooyo mago duto, nyaka ung'e ni onge wach mokor mag Muma ma janabi nyalo loko tiendgi gi pache owuon. ²¹Nikech weche mokor manie muma ne ok owuok e pach dhano, to Nyasaye ema nomiyo ji owuoyo, ka gin e bwo teko mar Roho Maler.

Jopuonj Mag Miriambo Kod Kethruokgi.

2 To joniabi mag miriambo bende ne nitie e kind ji kinde machon, mana kaka jopuonj mag miriambo bende biro bedo e dieru. Gibiro kelo akwala puonj

mag miriambo maketho ji, kagikwedo nyaka Ruoth mane ochweyogi (to mano nomi gitiekre kendgi piyo piyo nono!) ²Ji mathoth nolu kit ngimagi mobam makelo wichkuot, kendo ginimi ji nocha yo mar adiera. ³Nikech wuochgi mar dwaro gik malang' jopuonjgi nopiag dhogi gi sigendini magiseloso miriambo malombo ji; mondo gimau mwandu. To kum margi mane oiknegi chakre chon oliero e wigi, kendo lethruokgi ok nindi.

⁴Ka Nyasaye ne ok oweyo kata mana malaike mane otimo richo, to ne owitogi e gehena, koketogi e mudho mandiwa ka girito kumgi; ⁵ka nokumo koda ka piny machon, e kinde mane omiyo pi oyueyo joma ochayo Nyasaye, to Noa mane yalo mondo ji otim timbe makare kaachiel gi ji abiriyo mamoko, to ne oreso; ⁶ka Nyasaye nong'ado bura ni Sodom gi Gomora mine owang'o joma odakie miero molokore buru, kendo mi oketogi ranyisi mar gima biro timore ni joma ochayo Nyasaye; ⁷ka Nyasaye noreso Lut, ng'at makare, mane chunye chandore malit nikech ngima mochido mar joma ne ochayo chik, ⁸(nikech ne en ng'at makare, chunye ne chande malit kane oneno kendo owinjo timbe maricho ma tieng' mane odakgo timo pile ka pile); ⁹ka en kamano, to kare Ruoth ong'eyo kaka dores joma oluore kuom tembe ma giyudo kendo ong'eyo kaka okano joma richo ni kum chieng' Bura, ka gidhi nyime kod kumgi. ¹⁰Mani en adiera kuom jogo machopo dwaro mochido mag ringregi kendo mochayo loch.

Jogi wengegi tek kendo opong' gi achaya, kendo ok giluoro kata mana wuoyo marach kuom joloch mag polo, ¹¹ma kata mana malaike man-gi teko gi duong' molooyogi ok nyal wuoyo marach kuom chwechgo e nyim Ruoth Nyasaye. ¹²To jogi wuoyo marach ka gi yanyo nyaka gik maok giwinj tiendgi. Gichalo le maonge rieko, mager, maonge paro, mane ochwe mana mondo omaki onegi. Jogi biro lal nono mana ka le mag bungu.

¹³Ibiri chulgi chandruok kar chandruok ma gisekelo. Giwinjo maber ka gichopo gombo duto mag ringregi ratiro e nyim ji. Ka gidwanyore kendo gichopo gombogi maricho e chokruogeu mag sawo to gichalo mbelni kod gik motop.

¹⁴Wengegi ochiek ni terruok kendo richo mitnegi maok giwe. Giywayo mon mayomyom mondo gitimgo richo, kendo gilony e wuoro. Jogi okuong' adier!
¹⁵Gisebaro giweyo yo matir mi girwenyo ka giluwu yor Balaam wuod Beor, mane ohero misach richo. ¹⁶To pundane ne okwere kuom timne marachno, (kata obedo ni en le maok wuo kamano, to ne owuoyo gi dwond dhano mi ogeng'o neko janabino).

¹⁷Jogi gin sokni ma pi ongee kendo gin ong'weng'o ma yamo tero. Okan nigi mudho mandiwala molil ti. ¹⁸Nikech dhgi golo weche manono mag sunga mopong' gi gombo maricho mag kit dhano mohero richo, mondo gimji joma tinde eka tony aa kuom joma olal tim richo. ¹⁹Gisingo ni jogi thuolo to gin giwegi gin wasumbini mag richo makelo kethruok (nikech dhano en misumba gimoro amora molooyo ngimane). ²⁰Nikech ka ji osetony oweyo kethruok mar piny, kuom ng'eyo Ruodhwa kendo Jawarwa Yesu Kristo, eka bang'e gichako gidok e piny mi giga-jore kode kendo oloyogi, to achien gidoko maricho molooyo kaka ne gichalo mokuongo. ²¹Dine obedo maber molooyo mondo kik ging'e yor ngima makare molooyo ng'eye eka bang'e achien giloko ng'egi ni chike mopwodhi mane omigi. ²²Gima osetimorenigi chopo adiera mar ngero mawacho ni, "Guok odok nang'o ng'okne moseng'ogo", kendo ni, "Nguruwe moselwoki ochako odok dwanyore e chuocho."

Odiechieng Ruoth

3 Osiepena mageno, maa koro en baru-pa mar ariyo ma asendikonu. Asendikonugi giduto kargi ariyo mondo aparnu kendo achiew pachu obed moya-

wore. ²Adwaro ni mondo upar weche mane jonabi maler okoro chon kod chik mane omiu koa kuom Ruodhwa kendo Jawarwa kokadho kuom joote magu.

³Mokuongo tik tik, nyaka ung'e ni e ndalo mogik jomoko ma charo ji nobi ka gicharou kendo ka giluwu gombogi maricho. ⁴Ka gipenjou ni "Ruodhu mane onego oduogino to ere? Donge nyaka ne kwerewa tho gik moko osebedo mana machalre nyaka aa chakruok piny!" ⁵To jogi wigi wil mar oyiem ni chon gilala wach Nyasaye nomiyo polo obedo kendo piny ne ochwe koa kuom pi kendo ei pi. ⁶Kendo pi nogo bende ema Nyasaye nopong'ogo piny machon mokethego. ⁷Kuom wach nogo ema omiyo polo gi piny masani nitie, kendo okan ni mach. Okan-gi nyaka chop odiechieng'no ma joma ochayo Nyasaye nong'adnigi bura mi notiekgi chuth.

⁸To wiu kik wil gi gimoro achielni osiepena mageno: Ni kuom Ruoth odiechieng' achiel chaire gi higini alufu achiel, kendo higini alufu achiel chaire gi odiechieng' achiel. ⁹Ruoth ok dhi mos kuom chopo singruokne, kaka jomoko paro. Un ema oweyonu thuolo mondo ulokru, nikech ok odwar ni ng'ato olal kata achiel, to odwaro mondo ji duto olokre owe richogi.

¹⁰To odiechieng Ruoth nobi ka jakuo. E odiechieng'no polo noleny nono gi mor ma dino it, kendo gik mochue manie kor polo nowang' mi keth chuth, to piny gi gik moko duto manie iye nolal nono.

¹¹Ka gigi duto ibiri kethi kama, lero onego ubed joma chalo nadi? Onego udag ngima maler kendo moluoro Nyasaye, ¹²ka urito odiechieng' mar Nyasaye, kendo ka utemo beru mondo ochop piyo. Odiechieng'no polo nowang' kendo nokethe kendo chuech mag polo noleny kawang'. ¹³Wan to warito gik ma Nyasaye osesingonwa, ma gin polo manyien gi piny manyien, kama timbe makare lilo ema noyudre.

¹⁴Emomiyo, osiepena mageno, ka pod

urito odiechieng'no to temuru matek kaka unyalo mondo ubed joma ler maonge ketho e nyim Nyasaye, kendo beduru gi kuwe kode. ¹⁵Beduru kung'eyo ni deko mar Ruodhwa oweyo mana thulo mar yudo warruok, mana kaka Paulo owadwa mwageno be osendikonu gi rieko mane Nyasaye omiye. ¹⁶Barupege duto ondiko machalre, kowuoyo e igi kuom wehegi. Barupege oting'o weche moko ma tiendgi tek ma joma kia gi jo

hubagabaga gwenyo, mana kaka gigwenyo Ndiko mamoko bende, to tingino biro kelo nigi chandruok.

¹⁷Emomiyo, osiepena mageno, kaka koro useng'eyo wachni, ritreuru mondo kik ywau gi kethruok mag jomaricho mi uluar ua kama ber muchung'ie. ¹⁸To dhiuru nyime kudongo e ng'wono kod ng'eyo ma un-go kuom Ruodhwa kendo Jawarwa Yesu Kristo. En ema oyud duong' sani kendo nyaka chieng'! Amin.